

四庫全書

集部

欽定四庫全書

集部

劔南詩稿卷六十六

七

詳校官庶吉士_臣陳若霖

主事_臣呂雲棟覆勘

總校官檢討_臣何思鈞

校對官修撰_臣戴衢亨

謄錄監生_臣楊浚明

欽定四庫全書

劍南詩藁卷六十六

宋 陸游 撰

園中作

疎籬圍中庭野水赴方塘
春雨路易乾徐步蹋夕陽
豔紅杏梢忽已占年光
我老來日短乃復不自量
接花待其成鄰里共笑狂
萬事孰能料社櫟老不僵
磊磊盤中果安知不獲嘗
作詩遣閒愁一笑無留觴

寄題求志堂

古人不輕出出則堯舜其君民古人不輕隱隱則坐使
風俗淳孰知後世乃不然唐虞日遠如飛煙異端欲出
六籍上裔夷直居中夏先窮居求志達行道儻不塞責
真負天士固不可苟富貴顧亦豈可徒貧賤如其一念
有媿心寧不終身戴慙面老夫少年鐵鑄硯欲窺聖門
終未見祝君勿恃來日長八九十年如掣電

贈過門道人

賣藥人間兩屨輕
飄然雲水不論程
曉經浦口亂流渡
夜宿山家乘月行

春晚

門巷蕭條老病侵
春晴方快又春陰
啄吞自笑如孤鶴
導引何妨効五禽
雨洗杏花紅欲盡
日烘楊柳綠初深
雛鶯寧有平生舊
也傍茆檐送好音

又

村巷泥深晝掩門
倚闌搔首一消魂
花經風雨人方惜

士在江湖道更尊
擘浪忽看魚對躍
入雲時見鶴孤鶩
向來莘渭今安在
歎息誰能起九原

梨花

開向春殘不恨遲
綠楊窈窕地最相宜
征西幕府煎茶地

一幅邊鸞畫折枝

宣司靜鎮堂屏
上有邊鸞梨花

又

粉淡香清自一家
未容桃李占年華
常思南鄭清明路

醉袖迎風雪一杈

又

嘉陵江色嫩如藍
鳳集山光照馬街
楊柳梨花迎客處
至今時夢到城南

農桑

農事初興未苦忙
且支漏屋補頽牆
山歌高下皆成調
野水縱橫自入塘

又

水長人家浸稻秧
蠶生女手摘桑黃
差科未起身無事

鄰曲相過日正長

又

采桑蠶婦念蠶飢陌上忽忽負籠歸却羨鄰家下湖早
畫船青繖去如飛

又

蠶如黑螳稻青鉞夫婦畔桑各苦心但得老親供養足
不羞布袂與蒿簪

自嘲

野叟身常雜傭保第圃荒庭自鋤掃小兒畊養董董
足大兒游宦垂垂老朝餐未破百瓮壺晚餉猶存兩
困棗春粳但備翁作糜儲帛纔堪孫裂襦賢愚元自
一王尊癡鈍寧論萬馮道可憐對客猶自矜談道能
令君絕倒

春晚

寂寞又過桃李時東園微雨草離離破困食外有餘粟
殘髮白中生黑絲小疾已能忘藥石餘年寧復問著龜

飾巾待盡從來事閉戶燒香更不疑

又

正見山陂草木芽狂風忽埽萬枝花病懷久已忘春事
老眼猶能惜物華枕上有詩頻自改尊中無酒不妨賒
昔人漫道傷幽獨野鶴分巢即是家

閉戶

乞身林下養衰殘閉戶寧容外物干正使有為終淡泊
未能無疾已輕安寸陰息念如年永丈室端居抵海寬

老子爾來深達此却嫌兒女話團圞

晨起

初聽高枝鶉鴉鳴旋聞深井轆轤聲煙籠小閣猶疑雨
日射東窗頓作晴古洗注湯供潁濯春畦摘菜助魚烹
老人頽情雖堪笑終勝胷中懷不平

出遊

九日陰霾一日晴此行處處是丹青斷雲零落江郊路
壽木輪囷古驛亭媿婦微行望畊壠漁歌相和起煙汀

拔山意氣今何在猶有遺祠可乞靈

路過項羽廟

又

近過父老遠尋僧病起經行力漸增
織室踴機鳴軋軋稻陂瀦水築登登
淺深村落時分徑高下川原自作層
薄暮到家還熟睡隔林鐘鼓報晨興

又

吳地清明未減寒梨花初動杏花殘
平沙漫漫人爭渡微雨蕭蕭客跨鞍
野寺吹螺作春會山郵糴米具朝餐

已開九帙吾何覲時說金丹強自寬

又

東阡南陌適逢晴小蹇輕裝短作程白水滿陂秧馬躍
綠陰遶舍緯車鳴過村小婦憑牆看入寺高人攬袂迎
剩倩東風吹柳絮放翁詩到此時成

曳杖

曳杖寄彷徨徐行轉曲廊病知貪酒害老悔愛花狂庭
樹雲收影簾旌雨浥香悠然有佳處物我兩相忘

自詠

曾著杞菊賦自名桑苧翁常開羅雀網不下釣魚筒租

稅先期畢陂塘與衆同士章八十字世世寫屏風

子寫孝經

士章八十四字為屏風

雜興

謀生在衣食不仕當作農識字讀農書豈不賢雕蟲婦
當娶農家養蠶事炊春晨耕候春扈夜織驚秋蛩畦蔬
勝肉羹社酒如粥釀母為慕朝幘諂笑求見容

又

家世本臞儒自奉至儉薄肉食固難期間亦闕鹽酪賓
朋飯芋豆時節羹藜藿偶然設雞豚變色相與作家居
常守此自計豈不樂蔬園畏蹴蹋切勿思大嚼

又

家本徙壽春遭亂建炎初南來避狂寇乃復遇強胡于
時髡兩髦幾不保頭顱亂定不敢歸三載東陽居人事
固難料今乃八十餘努力未死間讀我先人書

又

讀詩讀七月治書治無逸王業與農功事異理則一此
外復何為齊民有遺術一飽不啻足切勿為利誅大屋
起道傍百鬼闌其室曷不觀陸翁食菜開九帙

又

三吳氣候異開歲固多雨今年已暮春霽日僅可數寒
氣薄腠理沈痛結心膂遣奴買藥物日夜事炮煮端居
情懷惡欲出泥淖阻安得平生歡駕言問良苦

雜感

病臥踐衰境躬耕歸故園
怒蛙號廢沼妖鵬嘯荒村里
巷魚殮薄坊場黍酒渾相逢
欲話舊意極轉忘言

又

道進身垂老方靈病已侵
知難逃死籍猶得遂歸心
星斗開孤劍塵埃拂素琴
妄庸常衮衮誰與論幽深

又

雨霽花無幾愁多酒不支
淒涼數聲笛零亂一枰碁
踏

海言猶在移山志未衰何人知壯士擊筑有餘悲

又

草徑纔容步茅廬僅庇牀原貧道尊顯回天死芬芳
誦喧清曉鉏耰滿夕陽此風能不墜韋布亦何傷

又

早仕讒銷骨遲歸悔噬臍短衣猶掩脛窮巷固多泥婢

喜蠶三幼

鄉中謂蠶眠為幼

奴貪雨一犂衡茅明我眼刮膜謝

金篦

又

春晚晴還雨村深醉復醒
溪添半篙綠山可一牕青
藥品隨長鏡花名記小屏
閒身幸無事吟嘯送餘齡

兩麀

吾園畜兩麀善驚未易馴
及今纔幾時弭耳常依人
飢食園中草渴飲溝澗濱
時時輟餘糧亦未耗吾困
吏或無佳政盜賊起齊民
孰能撫以德坐還三代淳

書感

疋馬曾為塞上遊東歸幾見剡川秋故城廢市古今歎
斷角殘鍾朝暮愁尺寸無功真碌碌耄期未死轉悠悠
阿奴尚喜強人意三日於菟氣食牛

開孫以二月二十日擊碎盤

書意

萬事馬牛風蕭然破屋中忍貧增力量耐辱見神通道
進天魔散心安客疾空微言施魚鳥一一脫池籠

讀唐書

力行可使金如土篤好能徠馬若龍斗米三錢本常事

風雲千載自難逢

雜題

貧中得味如餐蔗語下明心似到鄉對客欲談渾忘却
笑呼童子替燒香

又

半飽半飢窮境界知晴知雨病形骸軒昂似鶴那求料
枯槁如僧不赴齋

又

傳家只要存書種學道當知養聖胎寧使終身遷比景
莫令一物汙靈臺

又

大兒都門久栖栖小兒調官今復西鄰家父子我所羨
泥水沒膝扶畊犁

栽牡丹

攜鋤庭下斲蒼苔墨紫鞋紅手自栽老子龍鍾逾八十
死前猶見幾回開

夜聞姑惡

學道當於萬事輕可憐力淺未忘情
孤愁忽起不可耐風雨溪頭姑惡聲

哭開孫

學步漸扶牀乘車已駕羊
虛稱砌臺使不過玉函方杳杳
天難問茫茫夜正長
寂寥誰伴汝蕭寺閉空房

晚春東園作

雨餘木葉綠成陰
一日身閒直萬金
習氣自嫌除未盡

鳥啼花落尚關心

又

女郎花開春事闌
王孫草長思婦歎
蜂釀蜜脾猶未熟
雨催梅頰已微丹

禽聲

布穀布穀天未明
架犂架犂人起畊
宦途不似農家樂
東作西成過此生

秦皇酒窺下垂釣偶賦

酒瓮山邊古釣磯沙鷗與我共斜暉目前雖有小得喪
天下豈無公是非滄海橫流何日定古人復起欲誰歸
道邊醉倒君奚憾豈失風塵一布衣

出遊歸鞍上口占

渺渺煙波飛槩去迢迢桑野策驢還寄懷楚水吳山外
得意唐詩晉帖間每惜好春如我老誰能長日伴人間
世間自是無無得勛業元非造物慳

閒詠

本志常思退前緣
剎得閒聽猿來剎
縣采藥上稽山起
絕風塵表瑩然冰
雪顏向來香火地
五綴羽衣班

雨

曉望橫斜映水亭
暮看飄灑濕簾旌
不嫌平野蒼茫色
實厭空堦点滴聲
上策莫如常熟睡
少安毋躁會當晴
且將穡事傳童稚
未插秧時正好耕

立夏

赤幟插城扉
東君整駕歸
泥新巢燕闌
花盡蜜蜂稀
槐

柳陰初密簾櫳暑尚微日斜湯沐罷熟練試單衣

孤寂

晚境諸兒少在傍書堂孤寂似僧房家居不減旅懷惡
夏夜尚如寒漏長數筍蘆甘淡薄半盂麥飯喜豐穰
愚儒幸自元無事日課朱黃自作忙

明日觀孤寂詩不覺大笑作長句自解

獨處將如長夜何直將寂寞養天和愛身不情如懷璧
守氣無虧似塞河塵篋空存獲麟筆煙波嬾和飯牛歌

年來勛業君知否
燾下新降百萬魔

初夏出遊

早緣疎拙遂歸畊
晚為沈縣得養生
藥鑊釣竿緣已熟
海村山市眼偏明
安西萬里人何在
廣武千年恨未平
但使蓮峰歸路穩
亦無閒手揖公卿

又

平生與世曠周旋
惟有清遊意獨便
小竈炊菰山市口
東笏秣蹇海雲邊
春融恨欠舒長日
秋爽已悲搖落天

首夏清和真妙語為君誦此一欣然

又

泥黥樓鞵雨墊巾閒遊又送一年春
長歌聊對聖賢酒羸病極知朝暮人
廢堞荒郊閒弔古朱櫻青杏正嘗新
桃源自愛山川美未必當時是避秦

自詠

龜屋裁小冠鹿皮製短裘陸駕少游車
水泛淵明舟山澤與城市有路即可遊
或時一飯去間亦旬日留方見

草木萌忽已天地秋
淘丹雲澗冷采藥乳
穴幽逢人亦欣然有
問乃不訓摩挲金銅
人千載寄悠悠

五更聞雨思季長

幽叢鳴姑惡高樹號
杜宇驚回千里夢聽
此五更雨展轉窗未
明更覺心獨苦天涯
懷故人安得挿兩羽

醉中作

小市鐘聲斷高樓月
色新醉眠當大路狂
舞屬行人有客要元
亮無妻諫伯倫山花
信手挿不復惜烏巾

溪園

跌宕欲忘形溪園半醉醒靜看猿哺果閒愛鶴梳翎矮
榻水紋簾虛齋山字屏更須新月夜風露對青冥

初夏閒居

雲液初筍小窰香風漪乍展北牕涼巢乾燕乳蟲供哺
花過蜂閒蜜滿房閒戶不知春已去鈔書但覺日方長
所嗟詩思年來減虛負奚奴古錦囊

又

川雲漠漠雨冥冥濁酒閒傾不滿瓶蠶簇尚寒憂繭薄
稻陂初滿喜秧青王師護塞方屯甲親詔憂民已放丁
病起自憐猶健在不須求應少微星

又

松棚黯黯接虛堂埽地燒香旋置牀密葉留花供淺酌
斷雲障日作微涼高城薄暮聞吹角小市豐年有戲場
白首史官閒盡歲祇將搜句答流光

又

城上朱旗夏令初溪頭綠水蘸菰蒲花貪結子無遺萼
燕接飛蟲正哺雛簫鼓賽蠶人盡醉陂塘移稻客相呼
鄉中謂備
畊者為客長安青蓋金羈馬也有農家此樂無

又

啜茗清風兩腋生西齋雅具愜幽情熏衣過後篝爐冷
展卷終時嬾架橫巢燕何曾擇貧富鳴鳩元不為陰晴
但能與物俱無著小草新詩取次成

又

野水楓林久寄家，慣將枯淡作生涯。
小樓有月聽吹笛，深院無風看磴茶。
靜岸葛巾穿薈閣，拖筇杖入谿畧。
平居每與兒孫說，切勿人前一語誇。

又

水邊茅屋兩三間，野叟幽人日往還。
兩卷硬黃書老子，數峯破墨畫廬山。
功名會上元須福，生死津頭正要頑。
試說龜堂得力處，向來何啻半生閒。

又

煮酒青梅次第嘗
啼鶯乳燕占年光
蠶收戶戶繅絲白
麥熟村村搗麩香
民有袴襦知歲樂
亭無桴鼓喜時康
未嘗一事橫胸次
但曲吾肱夢自長

子坦今秋鹽官市征當滿作絕句寄之

八十老翁頭似雪
柯橋送汝淚頻揮
殘年豈料猶強健
却向柯橋接汝歸

子通調官得永平錢監待次甚遠寄詩寬其意蓋
將與之偕行也

黃紙起家陞仕籍青衫遡闕拜恩光署街汝勿憎銅臭
就養吾方喜飯香世事極知多倚伏人生正要小回翔
但令父子常相守斂版扶犁味總長

送韓立道守池州

千里江山控上流省郎懷綬去為州才華故在諸公右
談笑遙分聖主憂月墮麗譙喧鼓角雨餘綠野徧鋤耰
萬家歌舞春風裏秋浦如今不似秋

野興

寓館無常地輕裝不宿謀
迷途問畊叟過渡上漁舟
野飯香炊玉村醪滑瀉油
還家亦無事隨處送悠悠

又

小雨迎藜杖微風入葛巾
寧甘結襪系不作拜車塵
施藥鄉鄰喜忘機鳥雀馴
家山又初夏好在不貲身

又

山谿逢孤寺林窮渡小溝
松聲亂僧梵雨點雜魚遊
阜轟三軍帥金章萬戶侯
人生各有願未肯換扁舟

又

去去歷山村行行並廟垣湍流鱸魚小仄徑鮓花繁白
鷺飛如導青蘿險可捫歸途不寂寞迎笑有諸孫

東齋雜書

吾廬雖甚陋窗扉亦疎明開卷冬日暖曲肱暑風清昨
日一鳥鳴今日一木榮欣然與之接悲慨何由生

又

吾貧無時醒日月忽遄邁空林春采萁荒壠秋種稗孤

學有自來餓死奚足怪著書充棟宇一字不肯賣

又

負負無可言上上不須說天壤大如許我獨身子子苟
合不可為萬事聽瓦裂年登麥飯足得酒且勤歡

又

有客可劇談有酒可盡醉老夫老更窮終日惟坐睡既
無客款門酒亦未易致頽然北牕下兀兀有餘味

又

下帷聽雨聲開戶延月色霏霏半篆香湛湛一池墨徐
行舒血脈危坐學踵息吾聞諸先賢養生莫如嗇

又

門低不通車室隘劣容膝掩脰無全衣作字用拙筆親
朋孰可望門內自相恤一笑語吾兒汝馭未須叱

又

區芋常願雨秧菜常願晴吾兒行渡江晨起愁風生人
生各徇私夫豈造物情孰能均此意萬里皆春畊

又

吾居魚鱉鄉戒食無鮮薨雞鷺以御客乃者亦一埽區
區仁愛心殆可質蒼昊物情豈遠哉我亦吝肝腦

又

蓺花恨不茂雜草欲其盡心常墮貪愛否則近殘忍蝶
網猶翩翾蚓斷更菌蠢君其等觀之何者非可閔

又

藥與疾相當何恙不能已良醫善用藥疾去藥亦止晨

晡節飲食勞佚時臥起藉白米長生耄期直易爾

又

養生有妙理省事與寡言于此能力守衆說皆其藩擾
擾斲汝本饒饒傷汝魂要當俱置之息深踵白溫

又

學者學聖人斯須不容苟百年樂簞瓢千載仰山斗家
庭盛弦誦父子相師友但令書種存勿媿畊隴畝

梅市

沙際人家半掩扉，借炊小住不相違。
水生溪面大魚躍，風定草頭雙蝶飛。
竹院遊僧聞鼓集，煙畦老圃荷鋤歸。
浩然物外真堪樂，回首浮生萬事非。

初夏幽居

日長巷陌曬絲香，雨霽郊原割麥忙。
小擔過門嘗冷粉，微風解籜看新篁。
籬鄰婦收魚笱叩戶，村醫送藥方欲到湖邊還。
嬾動悠然扶杖立斜陽。

又

虛堂一幅接羅巾竹樹森疎夏令新
瓶竭重招麴道士
牀空新聘竹夫人
寒龜不食猶能壽
敝帚何施亦自珍
枕簟北牕寧有厭
小山終日對嶙峋

又

野草幽花無歇時
一窗終日對東籬
病猶獨醉雖堪笑
老未全衰亦自奇
古紙硬黃臨晉帖
矮牋勻碧錄唐詩
箇中疑是忘憂處
問著山翁却不知

又

東園梅熟杏初丹老子披襟每不冠
古硯坡陀麝煤綠
小山蔥蒨石盆寒移牀剩欲眠
松塢鼓枻還思泊蓼灘
未用絲毫辨差等黃塵終勝客長安

泛舟至近村茅徐兩舍勞以尊酒

小舸悠揚亦樂哉
迢迢故取北村回
山從樹外參差出
水自城陰曲折來
樂歲共忘東作苦
殘租不待急符催
舊鄰父老睽離久
喚取開顏把一盃

再次前韻

少壯即今安在哉輕舟訪舊莫輕回兒童擁岸迎舟入
婦女窺籬喜客來多難只成雙鬢改流年更著暮笳催
放懷魚鳥平生事少住茅檐盡此盃

題陳伯子主簿所藏秦少游像

晚生常恨不從公忽拜英姿繪畫中妄欲步趨端有意
我名公字正相同

入梅

并序

吳俗以芒種後得壬日為入梅今年正以此日

重雲蔽天比夜乃雨父老以為有年之候賦詩
以識之

今年入梅日雲脚垂到地芬香小麥麩展轉北窗睡甲
夜聞雨聲起拜造物賜三登于此卜一飽可坐致語兒
高爾困戒婦豐爾饋擊壤歌太平門無督租吏

劔南詩橐卷六十六

欽定四庫全書

劔南詩橐卷六十七

宋 陸游 撰

倚筇

老翁愈老欲安歸
歸臥稽山飽薜薇
未免解牛逢肯綮
豈能相馬造精微
靈山有士拈花笑
闕里何人鼓瑟希
我亦倚筇桑竹下
白髯蕭颯滿斜暉

薄暑

仲夏暑尚薄孤村日猶長僧坊初施浴行路亦饋漿老
我絕人事終日坐虛堂南北兩松棚細細吹清香堂中
無長物獨置湘竹牀我睡僕亦休睡覺誰在傍起坐拭
兩背小山鬱蒼蒼安得烏有生俱老無何鄉

晝寢

倦腕擎書忽墮前心清無夢腹便便丹成未要排雲去
且住人間作睡仙

又

困睫芒羊一欠伸
頽然忽已墮紗巾
鼻端雷動君無怪
路熟華胥不問津

睡起

睡起偃扇嬾搖枕
痕著面未全消
山丹石竹俱零落
孤蝶飛來伴寂寥

又

蒲萄換葉欲成陰
歲月催人感慨深
安得門前無俗客
岸巾臨水聽蟬吟

林間書意

三三兩兩市船回水際柴門尚未開垂綠筍梢風正惡
弄黃梅子雨初來紅螺盃小傾花露紫玉池深貯麝煤
領取林間閒富貴向來誤計伴鄒枚

又

小山草木一窗秋團扇江山萬里愁不讀狐書真僻學
未登鬼錄且閒遊少隨官牒差無策晚脫朝衫喜自由
半嶺嘯聲驚阮籍要知天下有高流

示子通

吾家太傅後衿佩盛青青我忝殿諸老汝能通一經學
先嚴詁訓書要講聲形夙夜常相勉諸孫待典刑

追涼小酌

綠樹暗魚梁臨流追晚涼持盃屬江月散髮據胡牀苦
費醺蘿美葛蒲清蜜香醉來呼稚子扶我上南塘

暑夜泛舟

暑氣方然一鼎湯聊呼艇子夜追涼微風忽起髮根冷

闕月初升林影長
漸近場中聞笑語
却從隄外看帆檣
超然自適君知否
身世從來付兩忘

又

烈暑元知不可逃
天將清夜付吾曹
小舟行處蒲風急
健鷁歸時山月高
愚智極知均腐骨
利名何啻一秋毫
等閒分得吳松水
安用并州快剪刀

短歌行

冠一免不可以復冠
門一杜不可以復開
山林兀兀但

俟死臺省袞袞吁可哀巨材倒壑亦已矣萬牛欲挽真
難哉阿房銅人其重各千石回首變化為風埃吾曹浮
脆不自悟乃欲冠劍常崔嵬勸君飲勿用盃酌但當手
提北斗魁挹乾東海見蓬萊安用俛首為低摧

小江

細靄斜陽一片秋數家茅屋小江頭
鰣聲遠入菰蘆夾
鳥陣斜飛蘭杜洲
暫住便成閒嘯詠
欲歸更復小遲留
老翁脚力猶能健
明日重來倚寺樓

歸興

輕雷輾輾斷梅初殘籜縱橫過筍餘

鄉語謂梅雨有雷為斷梅又謂筍出

林為過筍

飽有期程新買犢睡無厭足久捐書白蘋滿渚閑

揮榜綠樹連村獨跨驢夏日儘長歸亦暮水邊燈火已
踈踈

又

古道迢迢人跡稀羸驂欹帽遠村歸正看日暮牛羊下
又見月明烏鵲飛僧院踈鐘出林岫漁家微火耿窗扉

閒遊要是幽人事草露從教濕短衣

自春來數夢至閒中蒼溪驛五月十四日又夢作
兩絕句記之

騎驢夜到蒼溪驛正是猿啼月落時三十五年如電掣
敗牆誰護舊題詩

又

亭臯敗葉先秋實城上驚烏半夜啼自笑遠遊心未已
年來頻夢到蒼溪

自嘲

長日淡無事虛堂來遠風
愛眠從病蹇厭事嬾治聾
貓健翻憐鼠庭荒不責童
爾來添目暗又免送歸鴻

又

身臥孤村日年當大耋時
貧猶償酒券嬾悔許僧碑
輸稅質畊犢飯醫烹伏雌
勞生不須歎隨事且支持

雨霽

一雨洗炎蒸危闌偶獨憑
涼颼生翠蔭爽氣入鬢鬢
留庭

下宵遊燐盤中晝埽蠅絕勝塵土裏馬上嚼寒冰

大雨

萬壑風聲遠千林雨脚長溝盈懸爨竈屋漏徙衣囊未
說豐年喜先便永夜涼清秋病小愈起拖上瀟湘

社飲

世上升沈一轆轤古來成敗幾樗蒲試看大醉稱賢相

始信常醒是鄙夫

淵明詩云一士常
獨醉一夫終年醒

起舞非無垂白伴

暮歸仍有髭髥扶即今不乏丹青手誰畫三山社飲圖

采藥有感

蕪葭記霜露蟋蟀謹歲月古人于物理瑣細不敢忽我
少讀蒼雅衰眊今白髮中間嬰疾疾過日常卒卒澗毛
春可求山藥秋可掘雖云力探討疑義未免闕屏居朋
友散興妙誰敢發窮理已矣夫置饋當自罰

觀邸報感懷

六聖涵濡壽域民老年肝膽尚輪囷難求壯士白羽箭
且岍先生烏角巾幽谷主盟猿鶴社扁舟自適水雲身

却看長劍空三歎上蔡臨淮奏捷頻

送子通至梅市而歸

梅市長隄憶別情魯墟歸路當閒行
日沈菱浦看魚躍煙合菰叢聞獺鳴
蘸水門扉初半掩擁橋炬火已先迎
停撓不奈清愁得獨倚闌干待月明

述閒

披衣按摩罷據榻欠伸餘香煥翻心
字茶凝出草書客稀門每閉意悶髮
重梳賴有盆山樹幽情得少攄

幽居

謝病言歸一鹿車
短籬數掩護幽居
樹枝南畔有飛鵲
蓮葉東邊多戲魚
倦枕續成驚斷夢
斜風吹落讀殘書
興來偶曳枯筇出
父老逢迎却未疎

午暑

笛材織簟涼如水
霧縠縫幮薄若空
更著高安竹根枕
不妨專享北窗風

舟過道士莊

江籬芳杜滿沙汀
道士莊前酒半醒
上下風煙還竟日
往來魚鳥各忘形
歸人薄晚常爭渡
病葉先秋亦自零
興欲盡時猶小住
北村漁火看青瑩

晨興

晨興未櫛盥扶杖
並檐立斷雲方東
行庭草露猶濕朝
飢神益爽清虛自
來入可憐數雞雛
隨母啄遺粒蝶殘
蚍蜉喜鼠腐鳩鴉
集吾當一洗之漱
泉開玉笈

對酒

斷簡殘編不策勛東臯猶得肆微勤榮枯一枕春來夢
聚散千山雨後雲煙水幸堪供眼界世緣何得累心君
牀頭小瓮今朝熟撥置閒愁且一欣

泛舟

水長芳洲沒風生釣艇橫偶尋東埭去却作北村行宿
鳥昏方定流螢雨更明歸來未覺晚傳漏下重城

地僻

地僻臨湍瀨門幽長綠苔客書疑誤達僧刺媿虛來清

露蘋花坼斜陽燕子回自憐猶有恨佳日對空罍

東軒

終日在東廂閒消百刻香一枰分黑白雙硯列朱黃荷
氣侵簾馥桐陰覆井涼前知今夕夢孤榜上瀟湘

季夏雜興

蟻鬪知將雨蟲鳴覺近秋衰翁非愛酒無計奈孤愁

又

巉巉瘦驢嶺莽老牛陂

嶺在施黔間
陂在汝州

四海均羈旅何

人感此詩

又

熟睡一炊頃清談數刻間未言能近道要得暫身閒

又

疏泉澆藥壠枕石聽松風此樂慙專享無因與客同

夏夜暑毒不少解起坐庭中

窗間有螢過枕上見星流欲睡不堪熱長歌起飯牛

又

風從高樹下蟲抱短莎鳴小據胡牀坐還扶拄杖行

素飯

放翁年來不肉食盤箸未免猶豪奢松桂輒炊玉粒飯
醯醬自調銀色茄時招林下二三子氣壓城中千百家
緩步橫摩五經笥風爐更試茶山茶

曾樂道近
餽茶山茶

老態自遣

似見不見目愈衰欲墮不墮齒更危誰令汝年八九十
常欲強健寧非癡目昏大字亦可讀齒搖猶能決濡肉

若知用短百無憂此理正如夢一足矇矓艱碗俱有味
笑侮莫聽傍人喙但令孫曾能力畊一飽不妨還美睡

耒陽令曾君寄禾譜農器譜二書求詩

歐陽公譜西都花蔡公亦記北苑茶農功最大置不錄
如棄六經崇百家曾侯奮筆譜多稼儋州讀罷深咨嗟
一篇秧馬傳海內農器名數方萌芽令君繼之筆何健
古今一一辨等差我今八十歸抱耒兩編入手喜莫涯
神農之學未可廢坐使末俗慙浮華

雨夜

羸軀對影愴餘齡
追念平時只自驚
夏木正濃桐葉墜
秋風未起草蟲鳴
蠹魚似是三生業
汗馬難希百世名

時王師
方出塞

小雨迎涼何所作
北窗還對短燈檠

柴門

寂寞柴門不徹扃
槐花細細糝空庭
晚梅摘得鹽供飣
濁酒沽來草塞瓶
病已廢畊拋襪襖
閒猶持釣愛苓箬
經旬莫恨無來客
交舊疎如欲旦星

賽神

落日林間簫鼓聲
村村倒社祝西成
扶翁兒大兩髦髧
溉水渠成千耦耕
家受一廛修本業
鄉推三老主齊盟
日聞淮潁歸王化
要使新民識太平

菖蒲

古碣生菖蒲根瘦節蹙密
仙人教我服刀匕蠲百疾
陽狂華陰市顏朱髮如漆
歲久功當成壽與天地畢

又

菖蒲古上藥結根已千年聞之安期生采服可以仙斯
人非世人兩耳長垂肩松下語未終竦身上青天

迂拙

迂拙宜歸早乘除得死遲老稀朝市夢窮足道途詩譁
世無他技忘懷自一奇故溪幽絕處惟許白鷗知

夏夜

六尺筇枝膝上橫中庭岸幘聽鼃更露零金掌漢宮曉
月度銀河秦塞明菡萏晚花香未減梧桐病葉墮無聲

關河又見新秋近屈指流年一歎驚

夏末野興

半世天涯倦遠遊還鄉不減旅人愁
數聲相應鳩呼雨一片初飛葉報秋
山塢風煙僧院路河梁燈火酒家樓
絕知雪鬢宜蓑笠分付貂蟬與黑頭

又

漠漠川雲闔復開天公試手挽秋回
參差小市林邊出縹緲疎鐘雨外來
土塢飯香供晚餉布帘字大賣新醅

歸舟自逐輕鷗去不用城笳抵死催

示子孫

茆屋惟須補漏穿家人衣食亦隨緣豈容一事相關白
已過傳家十二年

夜雨

藩籬處處蔓牽牛惹惹叢深稗穗抽只道物生常茂遂
一宵風雨又成秋

劇暑

六月暑方劇喘汗不支持逃之顧無術惟望樹影移或謂當讀書或勸把酒卮或誇作字好蕭然却炎曦或欲溪上釣或思竹間碁亦有出下策買簞傾家貲赤脚蹋層冰此計又絕癡我獨謂不然願子少置思方今詔書下淮汴方出師黃旗立轅門羽檄晝夜馳大將先擐甲三軍隨指揮行伍未盡食大將不言飢渴不先飲水驟不先告疲吾儕獨安居茂林蔭茅茨脫巾濯寒泉臥起從其私于此尚畏熱鬼神其可欺坐客皆謂然索紙遂

成詩便覺窗几間颯颯清風吹

六月十夜風月佳甚起坐中庭有作

曼膚汗雨不勝揮夜景泠然暫解圍漱罷寒泉甘齒頰
夢回斜月入窗扉荷翻小浦孤螢度露濕危巢倦鶴歸
我亦馭風思遠適岳陽樓上酌湘妃

古井

道傍有古井久廢無與汲鄰里共浚之寒泉稍來集駕
言欲漱濯冀遠塵土襲躊躇復棄去綆短安能及

菴中紀事用前輩韻

埽灑一菴躬，瑣細蓬戶朝昏手。開閉荒山斲藥須，長鑊
小竈煎茶便短袂。空中咄咄安用書，身外悠悠固難計。
山僧野叟到即留，麥飯葵羹貴能繼。久貧奴婢多散去，
豈有跣足并椎髻。負薪長歌過此生，直疑身在鴻荒世。
急雨

觸熱支離老病增，忽看東北片雲興。疾雷載雨輸膏澤，
茂樹生風洗鬱蒸。采藥喜逢畎下客，說詩曾對剡中僧。

坐令身在羲皇上繞坐何須更設冰

舍東追涼

驕陽收火傘清露貯冰壺海湧四更月風生千頃蒲歌
狂忘老境意豁失窮途所恨朋儕盡無人為攬鬚

酒藥

愁憑酒破除病藉藥枝梧焦革死已久宋清今亦無幽
情寄魚鳥小艇雜菰蒲海上秋風早懸知肺渴蘇

六月十七日大暑殆不可過然去伏盡秋初皆不

過數日作此自遣

赫日炎威豈易摧
火雲壓屋正崔嵬
嗜眠但喜蘄州簟
畏酒不禁河朔盃
人望息肩亭午過
天方悔禍素秋來
細思殘暑能多少
夜夜常占斗柄回

急雨遽涼

急雨消殘暑
曠然天地秋
露螢矜熠熠
風葉送颼颼
涼簟惟添睡
明河不洗愁
流年又如此
隨處怯登樓

縱遊深山隨所遇記之

行穿犖确度谿路跨清溪一木斜歷盡艱危到平地
壞垣欹屋兩三家

又

山徑欹危細棧通孤村小店夕陽紅竹郎有廟臨江際
木客無家住箐中

又

道逢山客束荆薪口眼睢盱略似人試問村名瞠不語
割然長嘯上嶙峋

又

古寺蕭蕭不見僧
飛甍滿屋老梟鳴
空房終夜無燈火
斷木支門睡到明

感中原舊事戲作

蜂兒園裏香塵細
燕子樓中寶瑟斜
惟有天知太平事
乞傾東海洗塵沙

小涼

羸軀消夏困沈緜
不在林間即水邊
高臥已忘浮世事

小涼漸近早秋天
桔槔軋軋鳴幽圃
舴艋遙遙入暮煙
餘日無多那諱得
逢人自笑說明年

村居

人笑無才自笑狂
槿籬竹塢得深藏
自從病後辜風月
未免愁中讀老莊
行圃數畦秋菜長
泛溪十里晚荷香
叢書坐嬾無由續
且補忠州手錄方

城東

出郭溶溶細縠波
平生此地幾經過
祭餘野廟啼烏樂

酒賤村墟醉叟多
亭午疎鐘離石佛
斂昏微雨泊曹娥
采蓮艇子愁衣濕
不為人家惜綠荷

初秋露坐作短歌

房星縱心星橫斗牛闌
干河漢明青天露坐性所樂
不覺庭樹秋風生
秋風搖落君勿悲
明年花開還滿枝
人生衰謝則已矣
寧復鬢髮童顏時

池上

旋移吟榻並池橫
欲出柴門復嬾行
樹罅忽明知月上

竹梢微動覺風生
貧無醉日惟堅忍
疾遇涼秋亦漸平
二尺燈檠元好在
便思相伴聽蛩聲

秋稼漸登識喜

門外新場滑似油
早禾已慶十分收
虹霓不隔郊原雨
蜩螗爭催巷陌秋
人樂風傳迎社鼓
路長水濺采蓮舟
老翁自笑無他事
欲隱牆東學儂牛

野渡用前韻

十里平沙到渡頭
溪山合向畫圖收
老僧赴供袈黎古

醉叟行歌穰稔秋
斷岸煙迷耕處草
孤村雨送釣時舟
龍泉不斷元無恨
莫放神光上斗牛

秋後一日風雨

炎歊數日劇蕩滌
及秋初病葉風吹
盡鳴蟬雨打疎趺
涼謀社酒乘潤理
園蔬分喜寧無處
蒲中鱖鱖魚

感事

曾事高皇接雋遊
君恩天地若為酬
濟時已負終身媿
謀已常從一笑休
在昔風塵馳廐置
即今煙雨暗畊疇

孤愁欲豁寧無地野殿逢僧每小留

久無客至戲作

瘦影支離雪鬢繁
頻年老病臥孤村
雍容那有客聯騎
剝啄尚無僧叩門
濁酒香浮新社瓮
晚瓜味敵故侯園
茅檐蓬戶風煙晚
小酌欣然對子孫

乍涼

涼風蘇病骨搖落起詩情
一病輒數日幾詩終此生
招呼丹竈客結束玉霄行
預想溪橋路三更待月明

閒趣

絕迹市朝外結廬雲水間
心平詩淡泊身退夢安閒
有酒旋尋伴無門那說關
桐江故不遠日暮趁潮還

溪上

溪上秋來風露清
蕭然浴罷葛衣輕
看雲舒卷了窮達
見月虧盈知死生
老去關心惟藥裏
閒中消日付茶枰
故人書札頻相問
何日芒屨上赤城

秋詞

東吳七月暑未艾川雲忽興天晝晦蔽空雨點弩發機
平地成渠屋穿背早禾玉粒自天瀉村北村南喧地碓
大牲如阜酒如江相喚龍祠作秋賽

又

八月暑退涼風生家家場中打稻聲穗多粒飽三倍熟
車軸壓折人肩頽常年縣符鬧如雨道上即今無吏行
鄉閭老推迭歌舞竈釜日饜豬羊烹

又

蓐收功成將整駕萬頃黃雲收晚稼公私逋負一洗空
懷抱喜看兒姪姪從來婚聘不出鄉長自東家適西舍
年豐人樂我作詩朝畊夜織誰能畫

秋思

詩人本自易悲傷何況身更憂患場烏鵲成橋秋又到
梧桐滴雨夜初涼江南江北堠雙隻燈暗燈明更短長
安得平生會心侶一尊相屬送年光

老學菴北窗雜書

本慕修真謝俗塵中年蹭蹬作詩人
即今恨養金丹晚且向江湖把釣綸

又

偶住人間遂許時殘骸自笑尚支持
直須消破黃蘗盡始是浮生結局時

又

茅齋遙夜養心君靜處工夫自策勛
正喜殘香伴幽獨鴉鳴窗白又紛紛

又

小龍團與長鷹爪桑苧玉川俱未知
自置風爐北窗下
勒回睡思賦新詩

又

定交魚鳥欲忘形
獨岸綸巾坐草亭
不恨囊中無赤仄
且欣案上有黃庭

又

松棚接屋得陰多
石徑生苔奈滑何
盡道疎籬宜細雨

晴時最好晒漁蓑

又

龜常曳尾豈非樂鶴已鍛翎徒自傷造物今知不負汝
北牕夜雨默焚香

親舊見過多見賀強健戲作此篇

偶向人間脫駭機玉池中夜自生肥據鞍馬援雖堪笑
強飯廉頗亦未非道貌安能希晬盎世緣但可付猗違
他年不死君須記會在天津看落暉

元微之贈老人詩云天津橋上無人

識獨倚闌

千看落暉

小病兩日而愈

病骨羸然山澤臞故應行路笑形模記書身大似椰子
忍事癭生如瓠壺美酒得錢猶可致高人折簡孰能呼
不如淨埽茅齋地臥看微香起瓦壚

秋興

脩蔓叢篁步步迷山村東下近魚陂釣歸恰值秋風起
棊罷常驚日景移病葉辭枝應有恨候蟲吟壁故知時

殘年我亦悲搖落薄暮空囊又有詩

又

八十仍當過二時加餐安寢豈前知晨梳脫髮雖無數
社瓮新醕已有期偶為買花經廢圃時因蹋藕下清池
尚餘一事終關念安得兒孫少別離

日用

舊好疎毛穎新知得麴生幽居無一事枕臂聽松聲

又

春穀灌園蔬日長閒有餘何妨忍揮汗合藥施鄉閭

又

貧知藜糝美渴愛粟漿酸食少從奴去人稀苦屋寬

又

空舍封書篋多年飽蠹魚還家貧不死讀盡舊藏書

劔南詩橐卷六十七

欽定四庫全書

集部

劔南詩稿卷六十八

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劍南詩彙卷六十八

宋 陸游 撰

七月十一日見落葉

葉彫非一日盛夏則已然一葉復一葉及此搖落天晨
起坐堂上散若飛鳥翩昔時可藏鷄今欲不庇蟬顧視
庭中草亦復非阡眠百穀秋皆成是謂造化權豈謂草
木計而欲求兩全物理貴見微勇退差為賢

龜堂一隅開窗設榻為小憩之地

并欄檐蔔障斜陽旋置臨階八尺牀小展窗扉無大費
略加苫蓋有餘涼老來愈覺歲時速夢裏不知途路長
試問神遊向何處月明揮榜上瀟湘

南門晚眺

奚奴前負一胡牀門巷楸梧已漸黃不歷塵埃三伏熱
孰知風露九秋涼蕭蕭浦溆漁歌晚漠漠陂塘稻穗香
勿恨行雲吞素月夢回正愛雨淋浪

進德

進德工夫在日新正如更歷自知津迷時誤認毒為藥
定後始知天勝人四壁不妨身落魄萬夫誰敵膽輪囷
遺經在匱君毋厭燈火青熒漸可親

次韻邢德允見贈

人間榮悴固難窮歲月推遷即老翁馬駿初非凡眼識
源深終與大川通細思渭北希高價終勝淮南誚發蒙
莫學三山頑鈍叟一生空耗太倉紅

秋懷

居在三家聚門纔一木橫用寬緣歲樂斂薄為時平疎
樹葉遲落遠村燈更明題詩雖草草亦足寫幽情

又

村晚歸牛下林昏宿鳥喧微升天際月半掩水邊門衣
杵悲邊信漁歌斷客魂老人交舊盡此意與誰論

又

客思殘荷外農功晚稻前祭多巫得職稅足吏無權浦

漱家家釣村墟點點煙歸舟葛衣薄始覺是秋天

又

典琴沽市釀賣劍買吳牛雞黍隨時具江山到處留隨
僧日一浴笑更月三休安得沅湘客相從賦遠遊

又

心常凝不動形要小勞之活火閒煎茗殘枰靜拾棋
書朝日出丸藥晝陰移意適還休去悠然到睡時

又

曩得治中俸湖山偶卜居身嘗著禾譜兒解讀農書遇
事絕欣厭接人均戚疎乾坤雖浩浩等付一蘧廬

又

秋暑雖猶在晨興氣已清蠻童掃荒徑獠婢滌空鎗病
樹有凋葉殘蟬無壯聲書生守故態已復理燈檠

又

種樹清陰滿鈔書蠹字穿老身猶在世屈指不知年棄
紙儲詩橐長筒聚藥錢一生如一日正可付之天

又

望遠目猶明登高脚更輕每思遊赤壁時夢上青城燈
下書如蟻花前飲似鯨古仙曾歷考強半出儒生

又

昨者風雨過浩然天地秋年光雙雪鬢生計一漁舟賣
藥來查浦聽猿到沃洲平生畏暑毒八月記初遊

出遊

來往人間不計年一枝筇竹雪垂肩掃除身外閒名利

師友書中古聖賢
支遁山前饒石水
葛洪井畔慘風煙
小癡大點君無笑
買斷秋光不用錢

又

行路迢迢入谷斜
繫驢來憩野人家
山童負擔賣紅果
村女緣籬采碧花
篝火就炊朝甌飯
汲泉自煮午甌茶
閑遊本自無程數
邂逅何妨一笑譁

東窗獨坐書懷

秋豪外物不關心
竹塢梅村惜未深
蓬戶夜涼燈煜爚

盆山雨潤木蕭森
潔齋入靜三熏沐
宴坐降魔七縱擒
但恨圖書開調護
不勝鼠齧與蟲侵

書歎

齊民困衣食如疲馬
思秣我欲達其情
疎遠畏強聒有司
或苛取無并亦豪奪
正如橫江網一舉孰能脫
政本在養民此論豈迂濶
我今雖退休嘗綴廷議末
明恩殊未報敢自同衣褐
吾君不可負願治甚飢渴

荷鋤

五畝畦蔬地秋來日荷鋤何曾笑爾輩但覺愛吾廬
膽怯沽官釀瞳昏讀監書區區尚多事未解雜樵漁

病臥

老境偏饒臥秋天不肯晴愁憑書解散病仗藥支撐
果熟烏烏樂村深雞犬聲邊頭定何似頗說募新兵

秋夜獨坐聞里中鼓吹聲

收盡浮雲見素娥青天脈脈映明河時平里巷吹彈鬧
歲熟人家嫁娶多高會不知清夜永散歸想見醉顏酡

小牕燈火晶熒處也有人賡七月歌

老歎

老翁今日飽還嬉常拾兒童竹馬騎食為齒搖艱咀嚼
冠因髮少易傾敬烏烏歌罷人誰問咄咄書成自不知
堪笑殘生似蒲柳秋風未到已先衰

草堂

南出湖壩有廢堤草堂只在鶴巢西清風滿榻眠初起
落葉平溝路欲迷新酒已知迎社熟秋鶯猶作傍簷啼

鄰翁相遇饒言笑共喜年豐米價低

齋中讀書罷有感

少時學問苦匆匆弦誦光陰轉手空聖域淵源雖自力
故交零落與誰同荒村莫恨身垂老後世元知論自公
但掩齋扉憑曲几忘憂正在寂寥中

雨欲作步至浦口

雨作千山暗風來萬木號放懷忘世事徐步出亭臯野
處惟知遜心期不復豪宋清捐善藥須賈遺綈袍寧乞

陶翁食難鋪楚客槽精心窮易老餘力及莊騷杖屨時
行樂鋤耰慣作勞正令朝夕死猶足遂吾高

鏡湖有鳥名水鳬鳴於春夏間若曰打麥作飯偶
有所感而作

人生天地中賦予各有限所享過所賦鮮不貽後患玉
食害而家此語禹所難麥飯勿謂薄耕時泥及胔土墻
竹為挾鹽酪調藜苳吾媿人豈知尚以陋見訕恨亦見
事遲失脚墮名宦千載梁伯鸞巍然吾無間

自述

早畏危機避巧丸
長安未到意先闌
心如老馬雖知路
身似鳴蛙不屬官
閒駕柴車無遠近
旋沽村酒半甜酸
羣兒何足勞情怨
胸次從初抵海寬

秋興

晨興秋色已淒淒
唧唧猶聞隔浦雞
說與簷門謝來客
要乘微雨理蔬畦

又

村酒甜酸市酒渾猶勝終日對空樽
茅齋不奈秋蕭瑟
蹋雨來敲野店門

又

困儲赤米枝梧飯篋有青檀
準擬寒政使堆金無處用
不須常貯一錢看

又

病起殘骸不自支
旋烹藜粥解飢羸
一編蠹簡青燈下
恰似吳僧夜講時

又

莫笑門庭草棘荒也能隨事答年光
半瓶野店沽醇碧一畚鄰園餉矮黃

又

白頭韭美醃蘆熟鱸尾魚鮮斫鱠成
却對盤餐三太息老年一飽費經營

又

淹速從來但信緣襟懷無日不超然
喚船渡口因閒立

待飯僧牀得暫眠

又

懲羹吹壺豈其非亡羊補牢理所宜白頭始訪金丹術
莫笑龜堂見事遲

又

赫赫能令京兆死沾沾正坐魏其愚何如六子山行樂
臚膊常懸酒一壺

又

放翁老矣欲何之采藥名山更不疑但入剡中行百里
姓名顏狀有誰知

又

樵客高僧兩斷蓬偶同煙榜泛秋風栖賢雪夜匆匆別
豈意相逢在剡中

又

鼉鼓華鯨響寺廊殘蕪落葉弄秋光蹇驢繫著門前柳
閒覓題名拂敗牆

秋夕書事

秋夕初多露漁家半掩扉鵲飛山月出犬吠市船歸影
瘦悲形瘁冠偏感髮稀眼中無宿土老我欲疇依

又

寂寂青楓岸蕭蕭白板扉端居常嬾動偶出却忘歸時
奉徵科簡師還驛置稀江村日無事煙火自相依

薄粥

薄粥枝梧未死身飢腸且免轉車輪從來不解周家意

養老常須祝哽人

拄杖

吾嘗評拄杖妙處在輕堅何日提攜汝同登入峽船

小築

小築清溪尾蕭森萬竹蟠菴廬雖逼仄庭戶亦平寬摘果觀猿哺開籠放鶴盤澹然還過日無處著悲歡

又

小築隨高下園池皆自然鋤山得靈藥斲坎遇寒泉幽

檻花房斂深林果蒂駢鄰翁亦好事相伴送流年

一編

一編垂首北牕前皎皎寧當逐物遷道有廢興何與我心無媿怍始知天昔嘗西戍八千里今復東歸三十年死去雖無勲業事九原猶可見先賢

埭北

煙村湖埭北魚市廟壩東急雨時時作輕舟浦浦通新芻聚津口簫鼓鬧林中烏桕禁愁得來朝數葉紅

風雨

殘暑時當盡清風勢自回重雲韞日月大雨挾風雷老
樹不自保毀巢吁可哀却愁新雁到莫境更禁催

解嘲

心如頑石忘榮辱身似孤雲任去留酒瓮飯囊君勿誚
也勝滿腹貯閒愁

識喜

本自怕沾京洛塵固應不吐相君茵偶逃黿作鯨吞地

幸保詩狂酒病身傲世曾歌楚人鳳著書久絕魯郊麟
山村且試筇枝興風月秋來正一新

寓興

窮巷無來客秋風獨浩歌壯年閑處老佳日病中過甚
欲攜長鏡仍思擁短蓑逢山皆可隱不必上三峩

老馬行

老馬虺隤依晚照自計豈堪三品料玉鞭金絡付夢想
瘦稗枯萁空咀噍中原蝗旱胡運衰王師北伐方傳詔

一聞戰鼓意氣生猶能為國平燕趙

農家

吳農耕澤澤吳牛耳濕濕農功何崇崇農事常汲汲冬
休築陂防丁壯皆雲集春耕人在野農具已山立房櫳
鳴機杼煙雨暗蓑笠尺薪仰有取斷屨俯有拾洪水昔
滔天得禹民乃粒食不知所從汝悔將何及孩提同一
初勤惰在所習周公有遺訓請視七月什

對酒作

齒落不廢嚼足跛尚能履書生之所遭僥倖有如此自知窮事業元不直杯水徒行若車安蔬食如肉美或時得斗酒亦復招鄰里不肯歌烏烏行矣呼起起

秋分後頓淒冷有感

今年秋氣早木落不待黃蟋蟀當在宇遽已近我牀況我老當逝且復小徜徉豈無一樽酒亦有書在傍飲酒讀古書慨然想黃唐老矣狂未除誰能藥膏肓

即事示子邁

四十已悲非少年
耄期何事每歡然
遊山夜雨眠僧院
沽酒秋風上釣船
諸友詩章來疊疊
小兒筆勢亦翩翩
眼邊不是常蕭索
終憶巢居訪老仙

青城上官道人結
巢古松抄數十年

醉中絕句

有山有水登臨地
無病無愁敵傲身
世念秋毫除未盡
麴生應恨白頭新

又

左殮右粥年年飽
南陌東阡處處閒
幸免催租敗幽興

豈容對酒惜酡顏

種麥

墾地播宿麥飯牛臨野池未能貪佛日正恐失農時
矲鋤耰力勤勤祝史辭嘉平得三白吾飽豈無期

秋晚

梧桐落井牀蟋蟀在書堂徂歲聿云莫攬衣慨以慷
一生常蹭蹬萬事略更嘗賴有銘心語南華論坐忘

又

身世呻吟裏園廬寂寞中家貧憂酒券才盡畏詩筒
陂水瀦猶滿山苗穫欲空兒孫更力作勿媿禹遺風

秋穫後即事

多稼如雲接百城村村鼓樂賽西成頓寬公賦私逋責
一洗兒啼婦歎聲社酒粥釀供晚酌秋菰玉潔芼晨烹
放翁醉飽摩便腹自炙毫甌試雪坑

又

秋穫春耕力尚餘雨中襍穡種寒蔬築居正可茂生草

出市何妨蹇驢老境朝晡數匙飯腐儒生死一編書
敲門忽有崐山使慚愧交情未作疎

是日得張季長書

行飯至湖上

行飯消搖日有常青鞋又到古祠傍殘蕪滿路無多綠
落葉投空不待黃只道詩書能發冢豈知博簿亦亡羊
此身只合都無事時向湖橋看戲場

晨出

昧爽睡饜足起扶藜杖行關山開曉色草木度秋聲市

晚船初發奴勤地已畊道邊多野菜小摘助晨烹

老境

一生幸免踐危機老境還山飽薺薇智士固知窮有命
達人元謂死為歸臨牕蜀紙謄詩草出戶郿條繫褐衣
堪笑街頭小兒女問予君是伯休非

憶昔

憶昔梁州夜枕戈東歸如此壯心何蹉跎已失邯鄲步
悲壯空傳勅勒歌今日扁舟釣煙水當時重鎧渡水河

自憐一覺寒窗夢尚想浯溪石可磨

自嘲

清心不醉猩猩酒省事那營燕燕巢惟有著書殊未厭
莫年鐵硯亦成凹

解嘲

我生學語即耽書萬卷縱橫眼欲枯莫道終身作魚蠹
爾來書外有工夫

新寒

小雨戒新寒
衡茅已怯寬
甌香炊紫角
門靜挂黃團
杖穿茶塢移
舟傍釣灘
欲知秋有信
霜鬢不勝繁

夜歸

野店晡炊飯
溪橋夜據鞍
天回河絡角
海濶斗闌干
牧舍牛生犢
蔬園犬逐獾
今年時序早
九月已清寒

夢中作

萬里行求藥
三生誓棄官
鶴巢投暮宿
松麪續朝餐
進火金丹熟
凌風玉宇寒
人間日月速
歲歷又將殘

自勵

中年已懼小人歸況是駸駸老及時氣情欲歸思友助
學衰不進賴兒規無功追媿清時祿有命何憂晚節飢
羸病今年能未死潛心更下董生帷

九月一日未明起坐

病骨清羸八十餘空齋淒冷五更初忽聞雲表新來雁
起讀燈前未竟書坐久屢傳雞喔喔夢殘猶化蝶蘼蘼
農功漸畢身無事約束家童種晚蔬

小疾偶書

書生本願致時康自怪秋來疾在牀
胸次豈無醫國策囊中幸有活人方
但知元氣為根本正使長生亦粃糠
賢子何勞一除掃區區猶欲恃膏肓

初寒晨起

推枕悠然起寒燈誰與同
曉窗俄已白宿火尚能紅
老境呻吟外年華寂寞中
長飢亦何恨聊復固吾窮

霜降前四日頗寒

草木初黃落風雲屢闔開兒童鋤麥罷鄰里賽神回鷹
擊喜霜近鵲鳴知雨來盛衰君勿歎已有復然灰

題驛壁

輪囷古柳驛門前糴米歸遲突未煙隨計入都今四紀
驢寒僕瘦只依然

閒遊

大冠長劔已焉哉短褐禿巾歸去來五世業儒書有種
一生任運仕無媒麥經小雨家家下菊著新霜處處開

自笑閒遊心未歇青鞋蹋碎白雲堆

貧舍寫興

深山木食猶堪飽上古巢居亦自安
麥飯草廬吾已過故應高臥有餘歡

又

粲粲新霜編瓦溝離離寒菜入盤羞
贅童擁篲掃枯葉曠婢挑燈縫破裘

贅曠皆紀實

秋晚雨中作

新雁南來歲又殘
蕭蕭風雨暗江干
客疎似悉爾來病
酒薄不禁如許寒
草絡籬頭花尚碧
樹當浦口葉初丹
醉來且擁黃紬睡
莫問何時后土乾

待旦

晨光殘淡月急點殺寒更
歷歷記孤夢悠悠帶宿醒
攬衣推枕起亂髮遶牀行
歎息人間事還隨初日生

夜意

浮雲掃盡天如水
十里疎鐘到野堂
窗紙月明人不睡

屋茅霜冷夜初長歸休固已師沮溺承學猶能陋漢唐
安得子孫常念此不妨世世業耕桑

湖村

四十來居湖上村翩翩七見改初元風梢解籜竹過母
露葉成陰桐有孫渴鹿出林窺藥井馴鷗掠水傍棊軒
老人不用誇頑健時看孫曾浴畫盆

連夕熟睡戲書

投幘塵機息捐書困味長早眠猶有日晚起已無霜蝶

入三更枕龜楮八尺牀昏昏君莫笑差勝醉為鄉

小軒

礎杵聲中去日道小軒風露一簾秋人間走徧心如石
分付寒蛩替說愁

曉寒

悠悠殘夢伴殘更萬木風號曉氣清雞唱欲闌聞井汲
月痕漸淺覺窗明突煙騰碧炊初動衣焙堆紅火已生
小閣翻書裘葛暖早朝霜滑媿公卿

次韻朝陵葉院察時見寄

憶昨翩然別衆仙，秋風吹鬢感凋年。
虛齋無復客滿座，敗橐空餘詩百篇。
高誼未忘林下約，清吟重結社中緣。
不教落在塵埃地，萬頃煙波一釣船。

書意

巢山遠下溼，止酒謝中乾。
麤得養生妙，孰能非意干。
挂冠身始貴，屏藥疾方安。
自笑猶多事，時時把釣竿。

九月下旬即事

霜晚知麴熟山寒喜酒釀黃絲聽夜織赤米看晨舂
藥扶持老叟薪準備冬兒扶還客拜顧影歎龍鍾

城南

城南亭榭鎖閒坊孤鶴歸飛只自傷塵漬苔侵數行墨
爾來誰為拂頽牆

舟中記夢

石帆山下一漁翁風雨蕭蕭臥短篷幽夢覺時還自笑
閬州城北看蠶叢

送周郎

我居山陰古大澤四顧茫茫煙水白平時轍跡所不到
玉樹郎君肯來客衡門僅可俛首過陋室真成客膝連
木盤設食菜數箸共飽知君不予責期年相從無夜旦
一日復有千里隔送君津頭淚如縷老身恨不生羽翮
江湖道嶮非一二觸處兢畏真良策從今日望平安書
我欲燈前手親拆

村舍得近報有感

莫謂山村僻時聞詔令傳
寬民除宿負募士戍新邊
霜重瓦欲裂月明人少眠
殘年抱遺恨終媿祖生鞭

貧歎

老叟年年病書生世世貧
盜寧窺破索雀亦棄空囷
屋壞須撐拄衣穿厭補紉
今朝風日美且復過比鄰

明日復作一首自解

霜寒衣絮薄日暮爨煙微
冀北馬空老遼東鶴幸歸
飄零舊交少衰疾壯心違
每顧兒童笑吾貧未解圍

子虞調官行在寓磁團巷初冬遽寒甚作兩絕句
寄之

歲晚江湖行路難一樽何日共開顏
汝方僵臥磁團巷我亦飢吟飯顚山

又

知汝彈冠意易開苦貧未免覓微官
磁團巷口殘燈火愁絕霜風十月寒

劍南詩藁卷六十八